

Tii te Paulo nge céii lépwo Galat Atabuhi ko a tii

Woo na e tii a tii ce?
Wo Paulo, pa apostolo.

E tii éniile?
Wieli é ha awieme a jo 48 me 49, he e mu Antioche wo Paulo, ânebuhe a pitapitihi ubwo te lépwo apihuô te ni acéihi ne ko Kériso ne Iérusaléma ha a jo 50. (Omehi *Apostolo* pwahamii tii 15.) Wieli a bécéiuhe tii na e tii wo Paulo.

E tii me dee?
Me de ni acéihi ha a duaan Galat, ha amu Turki jena. Wieli a province Galat, he na e lang ni pwomwo ubwo Ikone me Listre me Derbe. Ke wo Paulo me Barnabas, ke lu pipatemehi a Pwooti Wâé nelang ha a jo 46–47 (omehi a *Apostolo* pwahamii tii 14), te ju alo jo ânebuhe a bwo tii na a tii télé.

É ko ade na e tii?
Hiwon lépwo Galat na time uce lépwo Juif. Ke é alecehe a bwo céihi télé ne ko Iésu, ke lé âbé wo lépwo béé apwocémun, ke lé cuwokolé me lé âcehi ati ni patén ko a pwoiitihi te lépwo Juif, pwohewii a bwo pwotegoop, me paciitihi ni béé tan. E te junihe okéé wo Paulo ne ko lépwona lé pii anaa. Ke e okéé ne ko lépwo Galat mwo, be

lé pwo me lé piâ ité koja a ju céihi (1.6–9; 3.1–3).
E te junihe pipwoééhelé, be lé pwohewii lépwo
ju naîn, ne he nii Iésu Kériso (4.19).

Ade ace âne a tii ce?

Wo Kériso, ke e caa tuwokenye, beme tice celi
me e ciekenye (5.1). Piticenaado ne ko ati ni
patén ko pwoiitihi ânebun. Be pwocoon me nye
mwomwon ne he pwahamii Padué mu ko a bwo
piténédehi nen denye ni patén. Kehe te icehi mu
ko a céihi tenye ne ko Kériso (2.16). Ke wo Padué,
ke e pwo me wogenye ni apulie na mwo coho
(6.15). Ke time bo uce wogenye celi nye mulie ha
a mulihenye, kehe te wo Kériso na e mulie konye
(2.20).

A bwomune a tii Galat

Pipwobwocu (1.1–5)

Te céiu cehi a ju Pwooti Wâé (1.6—2.21)

Tode Paulo beme e pipatemehi (1.11–24)

Lé hegieng wo lépwo béé apostolo (2.1–14)

A âne a Pwooti Wâé (2.15–21)

Tuwokenye koja ni patén (3.1—6.18)

Time uce jan ni patén (3.10–25)

Ni naî Padué mu ko a céihi (3.26–29)

Nemwo pwo me ciekewé mwo! (4.8–20)

Lupwo piapwo na alo (4.21–31)

E caa tuwokenye wo Kériso (5.1–12)

Piténéde a Jenen Iitihi (5.13–26)

Bénebwéne pwooti ke bépinelé (6.1–18)

Pipwobwocu

¹ Woéo* Paulo na é pwotii. Woéo pa *apostolo, be lu pipégaliéo wo Iésu *Kériso me Padué Caa, pana e pamulipi Iésu mu ha amele. [Ke lu pahedeéo ngen, me é pipatemehi a pwooti telu.] Time é uce wonaa mu kô aceli lé pii ne ni apulie, be time uce ni apulie na lé pwo me woéo pa apostolo!

² É pwotii lé céiikewé, wogewé ati ni *puco te ni acéihi ha a province Galat. Ke lé ne bwocu tewé mwo ati lépwo acéihi ne ko Iésu Kériso na élé éni.

³ Wâé heme e mu kowé a *pipwoééhe tice ja kon me a péém, na e âbé mu ko Padué Caa tenye me Padaame Iésu Kériso. Adéikewé!

⁴ Wo Padaame Iésu, ke e pineeng me e mele, beme e tuwokenye koja ni ta pwo tenye, ke e celuimikenye koja a mulie na ta ne pwo a bwohemwo ce. Be weengaa ana nime Padué Caa tenye kon. ⁵ *A wâé, ke te a de Padué cehi, dieli mwo! Wâé heme wonaa! Amen!

te céiu cehi a ju pwooti wâé

(Pwahamii tii: 1—2)

⁶ Wo Padué, ke e caa todekenye, ko a pipwoééhe tice ja kon den {na e pwaadeniin bé wo Iésu Kériso}. Ke é téele kowé, he geé epin ko piâ ité koja pana e todekewé, me geé â téne a céiu pwooti [na lé pébé céiikewé ne ni béén]. ⁷ Kehe icehi ana te céiu a *Pwooti Wâé te Kériso. Ke wo lépwo [agele] na lé pipatemehi a céiu pwooti, ke

* **1:1** 1.1 Woéo—Grek: Wogeme. Wo Paulo na e pwotii, kehe icehi ana e habwii pie, te céiu a pwonimelé me lépwo acéihi béén na lé mu pelen. **1:4** 1.4 Galat 2.20 **1:7** 1.7 Apostolo 15.1,24

lé pibitehi a ju Pwooti Wâé. Ke lé pahaulihi ni pwonimewé.

⁸ Wâé heme *piapwo pa apulie na e pipatemehi ce béé pwooti celi pi-ité koja a ju pwooti, li geme† caa mi pipatemehi tewé! Ke te piwien mwo hemepie wogeme, ai é hemepie wo pace céiu *âcélo bé mu he miiden! ⁹ Geme caa pii tewé kuti, ke é pii mwo ni, pie, wo lépwona lé pipatemehi a pwooti na pi-ité koja a Pwooti Wâé li géé caa hegi, ke wâé heme e piapwolé wo Padué!

¹⁰ [Lé pii wo lépwonaa pie] geme hane me lé piwâékeme ne ni apulie. Úhu! É te pipwoeabwé te Kériso cehi. Time é mu uce hane me lé wâééo ne ni apulie; kehe é te hane cehi me e te piwâééo wo Padué!

Tode Paulo beme e pipatemehi

¹¹ Lépwó acéihi bééng, wâé heme géé temehi pie, a Pwooti Wâé na é ko pipatemehi, ke time e uce âbé mu ko ni apulie. ¹² Be time uce aceli é hegi mu ko pace céiu apulie, ke te tice pace apulie celi e pacémuniéo kon. Be te ana e te habwii tong [wo Padué] mu ko Kériso‡.

¹³ Be géé te temehi ehi ni bwopemiéo ânebun, he li é mwo te mu ha a pwoiitihi te lépwó [âjiénung] juif. Be é te junihe okéé ne ko nina lé céihi ne ko Iésu. Ke nimung me é tanahi a

1:8 1.8 1 Korénit 16.22 † **1:8** 1.8 Geme—ai Woéo. Wieli e piieng mwo wo Paulo. **1:10** 1.10 1 Tésalonik 2.4 **1:11** 1.11 Mataio 16.17 ‡ **1:12** 1.12 Be te ana e te habwii tong...mu ko Kériso—ai Wo Iésu Kériso na e pwo me é temehi, ai Wo Iésu Kériso he li e pihabwiieng dong. **1:13** 1.13 Apostolo 8.3

céihi telé. Ke é pwo me lé picani, ke é te junihe pwotahi ne kolé. ¹⁴ É ha a benaamwon naa, ke é te junihe pitaa koyalé, ne ha a pwoiitihi te lépwo *Juif, koja lépwo âjiénung na pijéhi jo heme me woélé. Ke é wédenilé, be é te junihe âcehi ehi ati ni huô me a bwomu te lépwo watiheme.

É ali pa Naî Padué

¹⁵ Kehe icehi ana wo Padué, ke li e caa mi pipégaliéo, he mwo te woéo tina nyaa tong, ke e todeéo ha a pipwoééhe tice ja kon den. ¹⁶ Ke e niimihi pie me e habwii tong pa Naîn, beme é pipatemhieng de lépwona time uce lépwo Juif. Ke me wonaa, ke time é uce ilehi ace bwo temehinaado koja pace céiu. ¹⁷ Be time é uce taa *Iérusaléma, me geme pitookeme me lépwo apostolo ânebuhung. Be é â epin nge ha a duaan Arabi. Ke é mulang, ke é mwojuia mwobé ne ha a pwomwo ubwo Damas.

¹⁸ É alecehe ni jo na cié, ke é taa Iérusaléma, beme gemu pitemehikemu me Pétéru§. Kehe icehi ana gemu te ju mu lang he na alo naadenitan cehi. ¹⁹ Ke time é uce ali lépwo béé apostolo, te icehi Cang, pa âjiéne Padaame.

²⁰ Ana é pii tewé ni, ke é pipatemehi tewé, ne he pwahamii Padué, ke time é uce getikewé.

²¹ É mulang [ke time é uce mu ha amu *Judé] kehe é â he lupwo piduaan ne Siri me Silisi. ²² Ke ati ha a benaamwon naa, ke time lé uce temehié

1:14 1.14 Apostolo 22.3 **1:15** 1.15 Ésaïe 49.1; Galat 2.7 **1:18**
1.18 Apostolo 9.26 § **1:18** 1.18 Pétéru—Grek: Céfás. Omehi
Ioane 1.42 me a *note*. **1:21** 1.21 Apostolo 9.30

wo lépwo acéihi mu Judé, be time lé mu uce aliéo. ²³ Kehe lé te ju piténe jepule kong. Be lé pii wo lépwo béén pie: «Wo pa apulie naa, ke weeng kuti pali e te junihe pwotahi ne kome ânebun. [Ke e pacuwo ni apulie, beme lé nemwo céihi ne ko Iésu.] Kehe é jenea ni, ke e caa pipatemehi ali céihi li e mu tanahi ânebun!»

²⁴ Ke é mu kong, ke lé tai pipaunu Padué.

2

Lé hegiéo wo lépwo béé apostolo

¹ Caa 14 ni jo alecehen, ke é mwojuia ngemwo *Iérusaléma imi Barnabas, ke é pé mwo Tit. ² Be wo Padué, ke e pii tong pie, me é mwojuia ne mwo lang. Ke geme pipwotapitihhi me lépwo apihuô te ni acéihi, ke é pipatemehi telé a Pwooti Wâé, na é ko pipatemehi te lépwona time uce lépwo *Juif. Be o wâé ne kong, hemepie céiu jélé ko ana é pwo. Be mepie time uce wonaa, ke wieli o te piticenaado ne ko ati ni penem dong*.

³ [Kehe icehi ana te wâé telé. Ke wâé telé mwo a bwo penem ibu temu me] Tit, pa apulie na time uce pa Juif. Ke time lé uce wâgo kon pie, me *pwotegoop ten [pwohewii a bwomu te lépwo Juif]. ⁴ Be wo Kériso Iésu, ke e caa tuwokenye, beme o te tice aceli me e bo uce ciekenye mwo†.

Kehe icehi ana pwo ni béé apulie, na lé te ju êjele bé hadenii ni acéihi. Ke lé pii pie lépwo

2:1 2.1 Apostolo 15.2 * **2:2** 2.2 Dernière phrase—Grek: Wieli piticenaado ne ko a bwo pitéte tong ânebun ke é jenea ni. **2:4** 2.4 Galat 1.7, 5.1,13 † **2:4** 2.4 1^e phrase—Grek: Etenye a liberté ne ko (Kériso Iésu).

acéihi béénye, kehe icehi ana lépwo apipwohuô. Be lé pwohewii ni coda, na lé mi êjetihî a amu, beme lé alihi ehi ni mulihe ni apulie hen‡. [Ke te junihe *mwiihi telé] a mwomwon na e ne tenye wo Iésu. Be nimelé me lé pwo me nye *apenem tice ja kon [ne ko ni patén]. ⁵ Kehe icehi ana time geme mu uce pipéce ne kolé, ke time geme mu uce piténedelé, ne he ni cuwo nahi naado. Ke geme cile a juuju ko a Pwooti Wâé me dewé§.

Lé alihi pie wo Padué na e pahedeéo

⁶ Mepwo é ne ko lépwo apihuô, lépwo apulie na piubwo jélé ne ha a céihi, ke te tice aceli lé pwo me pitaatéehi ne he ni pwooti na é mu pipatemehi. Kehe icehi ana time uce junaado ne tong, hemepie lépwo apulie ubwo, ne he ni bwo alihi nen de ni apulie. Be wo Padué, ke time e uce pipwoinen ne ko ni apulie.

⁷ Kehe icehi ana lé temehi pie, piwiekemu me Pétéru*. Be wo Padué, ke e pahedeeng ngen, beme e â pipatemehi a Pwooti Wâé te lépwo Juif. Ke woéo, ke e pahedeéo ngen beme é â pipatemehi a Pwooti Wâé te nina time uce lépwo Juif. ⁸ A bwopiinen pie, e penem ko Pétéru wo Padué, beme e *apostolo ten ne pele lépwo Juif; ke e penem kong, beme é apostolo ten, ne pele ni béén.

‡ **2:4** 2.4 4^e phrase—Geme patemehi ne éni a bwopiine a pwooti espions. § **2:5** 2.5 Beme o time uce pitaatéehi ace cuwo nahi naado mu ko a Pwooti Wâé, me genye tai hegi ati ni adéihi ten.

* **2:7** 2.7 Apostolo 22.21 * **2:7** 2.7—2.14 Pétéru—Grek: Céfás. Omehi Ioane 1.42 me a note.

⁹ Ke mepwo é ne ko lépwo apihuô ubwo na cié jélé: wo Cang, me Pétéru, me Ioane, ke lé hegikemu me Barnabas. Ke lé patemehi pie lépwona pibééme [ne he ni penem de Padué] ke me wogemu, ke me gemu â pele lépwona time uce lépwo Juif, ke woélé, ke me lé â pele ni Juif.

¹⁰ Ke lé te ju ilekemu cehi pie, me gemu niimi lépwo acéihi na pitice naamuulé [ne Iérusaléma]. Ke é te pwo ati kuti ha a ju pwonimung.

É pacihe Pétéru

¹¹⁻¹² É alecehen, ke wo Pétéru, ke e âbé caniêkeme ne Antioche ne Siri. É he e mwo ko mu peleme, ke lé mu piwiinaado ibu me lépwo acéihi na time uce lépwo Juif. Kehe icehi ana wo Cang, ke e pahede céiikeme [mu Iérusaléma] lépwo béén [na lé te junihe pwopahi a ju bwomu te lépwo Juif]. Ke mwoti Pétéru [ko ana lé pii ne kon] ke e tabuhi picepewie lépwona time uce lépwo Juif.

Ke me wonaa, ke time uce piwâ jo me é paciheeng, ne he pwahamii ati ni acéihi, beme é habwii ten pie, time uce wâé a huô ten naa.

¹³ Ke time uce weeng cehi, be ati ni acéihi na lé Juif, ke lé te tai pwohewiieng, die ko Barnabas mwo! Be piwâ jélé me lé habwii nina lé niimihi. Kehe icehi ana lé te temehi pie, ana lé pwo, ke time uce wâé.

¹⁴ Ke me é alihi pie, time uce mwomwon ni bwo engen delé, ne ha a Pwooti Wâé, ke é pii te

Pétéru, ne he pwahamii ati ni acéihi pie: «Wogo pa Juif, kehe icehi ana go tabuhi necu a bwo engen denye, ne he ni patén de lépwo Juif, beme geé pimulie ibu me lépwna time uce lépwo Juif. Ke é ko ade na go cuwoko ni béén na time uce lépwo Juif me lé pipwohewii lépwo Juif?»

A âne a Pwooti Wâé

¹⁵ Mepwo é ne kome[†], ke geme te Juif mu ha a bwo piâbeele teme. Ke é ânebun, ke geme mu pii ko lépwna time uce lépwo Juif pie, 'lépwo apwo na ta', be time lé uce âcehi ni *patén de Moosé[‡].

¹⁶ Kehe icehi ana é jenea ni, ke geme caa temehi pie, time e uce *mwomwon ne he pwahamii Padué wo pace céiu apulie mu ko ace bwo piténedehi nen den ni patén de Moosé, kehe te icehi mu ko a céihi ten ne ko Kériso Iésu. Ke wogeme, ke geme te céihi ne kon [beme e mu ha awiememe me Padué a péém] ke me wogeme ni apulie na me mwomwon ne he pwahamiin[§]. A péém me a mwomwon naa, ke e âbé mu ko a céihi teme ne ko Kériso, time uce é mu ko ace bwo piténedehi nen deme ni patén. Éa, [é pii mwo pie]: Te tice pace apulie celi e bo

[†] **2:15** 2.15 Mepwo é ne kome—ai Mepwo é ne konyu. Wieli ni pwooti ne he ni niide a tii 15 me 16 (wieli é die ha a niide a tii 21), ke ni behi ni pwooti te Paulo ne te Pétéru. [‡] **2:15** 2.15 (Niide a tii)—Grek: Wogeme, ke lépwo Juif ne ha a bwo picilekeme, kehe time uce lépwo apwo na ta, mu he ni béé bele. **2:16** 2.16 Apostolo 15.10–11; Roma 3.20–28; Galat 3.11 [§] **2:16** 2.16 E mu...mwomwon ne he pwahamiin—Grek: Justifiés. Omehi Mwomwon ne ha a Niinaado (Vocabulaire) ha anebwén ko a tii.

mwomwon ne he pwahamii Padué, mu ko ace bwo piténehehi nen den ni patén!

¹⁷ É mu ko anaa, na wogeme lépwo Juif, he li geme hane ace bwopwonen beme geme bo mwomwon ne he pwahamii Padué. Ke geme tooli he Iésu. Ke ni béén, ke lé pipé ne kome pie, wogeme 'lépwo apwo na ta', be time geme uce piténehehi ati ni patén. Éa, lé pii pie, wo Kériso, ke e péékeme, beme lépwo apwo na ta! Úhu! Time uce a juuju*! ¹⁸ Weengi ana ta: é hemepie é mwojuia cemwo ne mwo ko li patén li é caa tahi taabwon†! ¹⁹ Me é mulie he ni patén, ke o te junihe pwocoon de Padué me e piwâééo. Kehe icehi ana te é mu ko ni patén kuti, na é temehi ninaa! Ke é jena, ke é caa necu ni patén, beme é mulie me de Padué. Ke time e bo uce cieéo mwo, be caa pwohewiin heme é mele ne ko ni patén.

Be é he e mele ne ko a *kuricé wo Iésu, ke wogemu me weeng‡. ²⁰ Heme é mulie, ke time uce woéo, kehe wo Kériso na e mulie kong. Ke a mulihung jena ni, ne ha a éé apulip, ke é mulie hen ha a céihi ne ko pa *Naî Padué na e pipwoééhung, ke e mele me dong.

²¹ Weengaa a âpipati na e ne tenye wo Padué, é mu ko a *pipwoééhe tice ja kon den, beme

* **2:17** 2.17 Grek: É hemepie geme alihi temehi pie wogeme lépwo apwo na ta, é mu ko a bwo alihi temehi nen deme a mwomwon mu ko Kériso, ke kona wo Kériso, ke pa apenem de a ta? Úhu! Time uce wonaa! † **2:18** 2.18 Grek: Be hemepie é bahi mwo ali é caa patieden, ke é habwii pie é pwo ana ta. ‡ **2:19** 2.19 Grek: Be te é mu ko a patén na é mele ne ko a patén, beme é mulie me de Padué. Cemeitekemu ne ko a kuricé me Kériso.

2:20 2.20 Galat 1.4

nye mwomwon ne he pwahamiin. Ke woté? Kona é bo tahi taabwon anaa, beme é mu ko ni patén? Ûhu! Be mepie jan me pwo a péém ne ha awiemenye me Padué, me wogenye ni apulie na nye mwomwon ne he pwahamiin, mu ko a bwo piténédehi nen denye ni patén, ke wieli me te piticenaado ne ko a bwo mele te Kériso[§]!

tuwokenye koja ni patén

3

(Pwahamii tii: 3—4)

¹ [É téetikewé] wogewé lépwo Galat, be pwohewiin heme pipenem ni puniwé! Ade aceli e pahaulikewé [me geé padep koja a juuju]? Oniile jo ko pii tewé pie, wo Kériso, ke e caa mele ne ko a *kuricé [beme wâé te Padué gewé]?

² Weengi cehi ana nimung me é temehi kojakewé: Kona geé niimihi pie, geé caa hegi a *Jenen Iitihi, mu ko a bwo mulie tewé he ni patén? Ûhu! Te é mu ko a céihi tewé, ne ko a Pwooti Wâé ko Kériso! [Ke geé temehi ehi anaa!]

³ É ko ade na geé pwo me pihauli gewé kojan?

Te a Jenen Iitihi na e tabuhi a penem ne kowé. Ke kona geé niimihi pie, geé bo panebwénihi ha a éé apulip? Wogewé, ke pipatieden ni puniwé!

⁴ Kona geé o te pwo me piticenaado ne ko ati nina e tuie ne kowé dieli jena? Geé tahi taabwon ati ninaa?

§ 2:21 2.21 Grek: Time é uce tahi taabwon a pipwoééhe tice ja kon de Padué, be é hemepie nye mwomwon mu ko a patén, ke te ju piticenaado ne ko a bwo mele te Kériso.

⁵ Wo Padué, ke e caa ne a Jenen Iitihî, ke e pwo me geé pwo ni *pipwojunuun, na lé téetihî ne ni apulie. Ke kona geé niimihi pie, te é mu ko a bwo piténedehi nen dewé ni patén? Ūhu! [É pii mwo pie]: Te é mu ko a céihî tewé cehî, ne ko a Pwooti Wâé [ko Kériso]!

Wo Abérama ke pa béhabwiinen

⁶ [Nye pine ne he ni *tii iitihî pie]: *E céihî ne ko Padué wo *Abérama, ke é mu ko a céihî ten, ke wo Padué, ke e pwo me pa apulie na e *mwomwon ne he pwahamiin.* *Genèse 15.6*

⁷ É mu ko anaa, na wâé heme geé temehî pie, ati nina lé céihî [ne ko Padué] ke te woélé kuti naa, lépwo piebehî Abérama. ⁸ Be genye pine ne mwo he ni tii iitihî pie, wo Padué, ke e mi pii ten a pwooti wâé ce, pie: *É bo *adéi ati ni bele pwo bwohemwo mu kom!* *Genèse 12.3*

Weengaa ana e mi pii beetihî pie, e bo hegi ni béén na time lé *Juif, ke e bo pwo me lé mwomwon ne he pwahamiin. Ke te é mu ko a céihî telé, na e wonaa.

⁹ Wonaa ne mwo ko ati nina lé céihî [ne ko Padué] be lé o hegi mu kon ali adéihî li e caa ne te Abérama, mu ko a céihî ten.

Time uce jan ni patén

¹⁰ Kehe icehî ana lé apwohî wo lépwona lé niimihi pie, o wâé te Padué jélé mu ko a bwo piténedehi ne ni patén delé. Be caa tii ne mwo he ni tii iitihî pie: *Apwohî pana time e uce*

pitenedehi taaci ni patén na tii ne ha a tii ko patén! *Deutéronome 27.26*

[Ke te junihe pwocoon kuti me nye pitenedehi ati!]

¹¹ Nye alihi pie, o te tice apulie celi lé mwomwon ne he pwahamii Padué ko ace bwo pitenedehi ne ni patén. Ūhu! [Be caa te tii ne he ni tii iitihi pie]: *Wo pana e mwomwon mu ko a céihi, ke e o mulie.* *Habakuk 2.4*

¹² Genye alihi pie, ni patén, ke time e uce engen ne ko a céihi [kehe te é mu ko ni penem denye]. Be weengi ana caa tii ne he ni patén: *E ne a mulie te pana e pitenedehi ni pihuô na e hen.* *Lévitiqe 18.5*

[Kehe me wonaa, ke genye tai apwohi, be time uce jan!]

¹³ Kehe icehi ana wo Kériso, [ke e pipatupwoeng] ke e caa tuwokenye koja a apwohi ko ni patén, be e pé ne huîn a apwohi tenye [ke cemeiteeng ne ko a kuricé]. Be caa te tii ne he ni tii iitihi pie: *Apwohi pana pawiang ne ko a bacuwo.* *Deutéronome 21.23*

¹⁴ E wonaa wo Kériso, beme e o mu konye, nina nye céihi ne kon, a adéihi li e ne te Abérama wo Padué. Ke a juuju mwo, ne ko lépwona time uce lépwu Juif. Ke é mu ko a céihi tenye ne kon, ke genye hegi a Jenen Iitihi, na e caa mi pii ânebun wo Padué pie, me e bo ne tenye.

Ni patén ke e âbé aleche Abérama

15-16 Ânebun, ke e pii te Abérama wo Padué pie, me e bo adéieng. Me nye alihi ehi a pwooti te Padué ne he ni tii iitihí, ke genye pine pine pie e pii pie, me e bo adéi Abérama *me pa piebehieng. Genèse 12.7*

A bwopiinen pie *pana e bo âbeelee mu kon*. Time e uce tii pie **lépwopiebehieng**, kehe e tii pie, **papiebehieng**. Wo pa apulie naa, ke wo Kériso*.

Wo Padué, ke e *piapwo ne te Abérama, beme e *pajuujihi a bwopiinen den naa. Ke geé alihi, wogewé ni bééng, pie, mepwo é ne konye ni apulie, ke me nye piapwo ne ko ace céiu naado celi nye pii, ke time uce jan me nye pitaatéhi ai patieden ni pwooti na nye caa pii. [Ke me wonaa ne pelenye ni apulie] ¹⁷ ke genye temehi pie, wo Padué, ke time e bo uce pitaatéhi mwo nina e pii, li e caa piapwo ne kon.

Weengi ana nimung me é pii: Mepwo é ne ko ni patén, ke a naado na e ne wo Padué, mwo te ju 430 ni jo alecehe a bwopiinen den te Abérama. Ke ni patén, ke time uce jan me e pitaatéhi a cuwo nahi atii, ne he ni bwopiinen den ânebun.

¹⁸ Ke hemepie a adéihi, ke me e ne tenye, mu ko [a bwo piténedehi nen denye] ni patén, ke

3:15-16 3.16 Genèse 12.7, 13.15 * **3:15-16** 3.15-16 Wo Kériso, ke te weeng cehi na e pwaadeni ati ni adéihi me denye. Ke e pii konye pie nye piebehi Abérama, mu ko a céihi tenye ne ko Kériso. Grek: 15É cihe ko a bwomu te lépwo apulie: É hemepie e piapwo wo pa apulie, ke e pajuujueng...ke o te tice apulie celi jan me e pwo me tieden, ai ne ace behin. 16É ne ko nina caa mi pii ânebun, ke ni naado na pii te Abérama, me ni piebehieng, ke time uce ni piebehieng na hiwon. Te céiu cehi pa piebehieng, ke wo Kériso. **3:17** 3.17 Exode 12.40 **3:18** 3.18 Roma 4.14

wieli time e uce âbé mu ko a bwopiinen ânebun de Padué. Kehe icehi ana time uce wonaa, be wo Padué, he li e ne te Abérama a adéihi ten, mu ko a bwopiinen den ânebun. Ke e ne ten me piticenaado ne kon.

¹⁹ Ke heme wonaa, ke ni patén ke he me ni de? Te a naado li e ne tenye wo Padué alecehen, beme e habwii tenye ni ta na nye pwo. Ke e cuwo die ko a bwo tuie te pa piebehi Abérama na te céiu nang: pana e bo pipwaadeni ati ni adéihi†.

[A céiu mwo, ke time uce piwie ni patén me a piapwo, be nye pii pie, wo Padué, ke e ne] ni patén [me de a bele] na lé pipwaadeniin bé ne ni *âcélo. Ke [wo *Moosé ke] pa apipépwooti ten. ²⁰ Kehe icehi ana he li e piapwo wo Padué ne te Abérama, ke te tice apipépwooti hadeniilu. Be a naado na e te pipwo mu kon wo Padué [ke te tice pwooti te Abérama hen].

E mi habwii tenye Kériso

²¹ Kehe wonaa, ke kona ni patén, ke e cubwonihi a piapwo te Padué? Úhu! Be te icehi a piapwo na e pébé céiikenye *a ju mulip. Ke e pwo me wogenye ni apulie na nye mwomwon ne he pwahamiin. Ke te tice ace céiu patén celi jan me e wonaa. ²² Kehe icehi ana ni tii iitihi, ke e pii beetihi pie, é ati he ni naado, me ati ni apulie, ke lé tai mu haahi a junuu a ta. Ke [te tice ace bwopwonen, me] nye hegi a adéihi ko a

3:19 3.19 Apostolo 7.38; Roma 5.20 † **3:19** 3.19 Pana... Grek: Pana pwo a bwopiinen ânebun me den. **3:21** 3.21 Roma 8.2–4

piapwo, [kehe te icehi] mu ko a céihi tenye ne ko Iésu Kériso.

²³ Ânebun, ke pwohewiin heme nye pwokarépu. Ke ni patén, ke e wéikenye ati he ni tan, ucéihi a benaamwon na o habwii tenye a pwaaden mu ko a bwo céihi ne ko Kériso.

²⁴⁻²⁵ [Weengi a ocine ko ni patén]: Ânebun, ke pwohewiin heme pace caa te cémun denye celi e pacémunikenye, ke me e mi habwii tenye Kériso, ucéihi ace bwo tuie ten. Ke é jena ni, ke e caa te tuiebé kuti wo Kériso, ke genye caa céihi ne kon. Ke e caa pwo me nye mwomwon ne he pwahamii Padué. Ke time uce junaado me e mwo pacémunikenye mwo ne ni patén.

Ni naî Padué mu ko a céihi

²⁶ Heme nye‡ céihi ne ko Kériso Iésu, ke genye caa tai naî Padué. ²⁷ He li puukenye ne he nii Kériso, ke genye caa cuwohe ni epwén na mwo coho, beme nye pwohewiieng§.

²⁸ [Me nye caa mu ko Kériso] ke caa te tice aceli pi-ité ne ha awieme lépwo Juif me lépwona time uce lépwo Juif; ke é ne ha awieme lépwo *apenem tice ja kon, me lépwona time lé uce apenem tice ja kon; ke é ne ha awieme lépwo aiu me ni toomwo. Be caa céiu genye, mu ko ana caa céiu genye me Kériso Iésu.

3:23 3.23 Galat 4.3 **3:24-25** 3.24 Roma 10.4 **3:26** 3.26 Ioane 1.12 ‡ **3:26** 3.26 Nye—Grek: Geé. Piwien ne he ni niide a tii 26–29. § **3:27** 3.27 Roma 6.3 § **3:27** 3.27 Grek: Ati lépwona puulé ne he Kériso, ke a epwénélé, ke wo Kériso. A ocine ko a bwo necu ne ni huô tenye na ta, beme nye mulie ha a mulie na mwo coho, me Kériso. **3:28** 3.28 Roma 10.12

²⁹ Ke me genye caa mu ko Kériso, ke genye caa piebehi Abérama. Ke caa e konye a adéihi, li e caa mi pii te Abérama wo Padué.

4

Wogenye ke ni ju naî Padué

¹ Geé cuwoteeke niimihi ani, pie: Wo pa apulie, ke e bo hegi ati ni naamuu pa caa ten [heme bo caa ubwo nang]. Kehe icehi ana heme mwo pa cuwo ewa, ke time e uce piwéden koja lépwo *apenem tice ja kon de caa ten. ² Ke e te cuwo ko piténede lépwona lé wéieng, die ha a tan na e caa jahi wo caa ten.

³ Piwien ne konye. Be é ânebun, ke genye pwohewii ni cuwo ewa, be genye apenem tice ja kon de ni patén me ni duéé hauli*. ⁴ Kehe icehi ana é ha a benaamwon na e caa te mi pii jahi wo Padué, ke e nebé céiikenye pa Naîn. E âbeelee mu ko ê toomwo, ke e [mulie ha a éé apulie ne pele lépwona lé] mu he ni *patén de Moosé. ⁵ Wo Padué, ke e nebé pa Naîn, beme e tuwokenye koja ni patén na e ciekenye, ke e pwo me wogenye ni ju naîn.

⁶ A bwopwonen me nye temehi pie, wogenye ni naîn, ke wo Padué, ke e ne, he ni pwonimenye, a *Jenen Iitihhi te pa Naîn. Ke a Jenen Iitihhi, ke e ne me nye pii te Padué [ha a pipwodéén] pie: «Caa tong!» ⁷ Ke é mu ko anaa, ke caa tice aceli

3:29 3.29 Roma 4.13 **4:3** 4.3 Kolosé 2.20 * **4:3** 4.3 Ni patén me ni duéé hauli—ai Ni paa a bwohemwo. **4:4** 4.4–5 Ioane 1.14; Roma 1.3 **4:6** 4.6–7 Roma 8.15–17

e ciekenye†, be genye caa naî Padué. Ke e bo ne tenye ati ni *adéihi te ni naîn, na e caa te mi pii ânebun.

Nemwo pwo me ciekewé mwo!

⁸ Ânebun, ke time geé uce temehi Padué, ke wogewé ni apenem tice ja kon de ni nahi duée, koja Padué na te céiu nang. ⁹ Kehe icehi ana é jena na ni, ke geé caa temehieng. Ke te a juuju pie, te wo Padué kuti na e temehikewé. Ke é ne he pwahamiin, ke te tice niihe ni duée hauli, me ni patén; ke te piticenaado ne kon.

Woté? É mu ko ade na geé bitekewé mwojuia, me geé pitenedehi mwo ni naado naa? Kona nimewé me geé tai ni apenem tice ja kon delé mwo? ¹⁰ É mu ko ade na geé paciitihi ni béé tan, me ni béé wole, me ni béé benaamwon, me ni béé jo? ¹¹ Pwohewiin heme te piticenaado ne ko ati ni penem dong ne pelewé!

¹² É te cuwokowé, wogewé ni bééng, ne he nii Kériso, pie, me geé pipwohewiiéo [ke me geé pwo me tuwokewé koja ati ninaa]! Be woéo [pa *Juif, ke caa tuwoéo koja ni patén, beme] é pwohewiikewé [nina time geé uce Juif].

Ânebun, ke te junihe wâé ni bwomu tewé ne kong, ke wâé heme geé te cuwo ko wonaa‡. ¹³ Geé temehi pie, he li é mi pipatemehi tewé a Pwooti Wâé, ke é mu ko a cunu kong, na é tuie lé pelewé. ¹⁴ Ke geé gia ko anaa, kehe icehi ana time geé

† **4:7** 4.7 Caa tice aceli e ciekenye—Grek: Caa time uce wogewé ni apenem tice ja kon. **4:10** 4.10 Roma 14.5; Kolosé 2.16 ‡ **4:12** 4.12 Dernière phrase—Grek: Caa time geé uce pwo tong celi ta.

uce pihooniéó, me téetíéó. Ûhu, geé te hegiéó, pwohewiin heme woéo pa *âcélo te Padué, ke pwohewiin heme woéo, ke wo Kériso Iésu. ¹⁵ Ke geé te junihe pipwodéén kuti, ke pepule gewé me geé picani tong. Ke geé pipatupwokewé ati ne pehi ni wâé tewé me dong§!

Ke é jenaá, ke e wé a pipwoééhe me a pipwodéén dewé naa? ¹⁶ Kona geé niimihi pie, woéo pa acubwonikewé, mu ko ana é pii tewé a juuju?!

Nemwo tabemi lépwo apahaulikewé

¹⁷ [É temehi pie, wo lépwo apwocémun na lé tuié ne pelewé]*, ke lé hane me wâé tewé jélé. Kehe icehi ana time lé uce wonaa mu he ni ju pwonimelé. Be nimelé me lé pineitéékewé kojaéo, beme geé âcéilé.

¹⁸ É he li é mu pelewé, ke geé mwoiu me geé pwo nina wâé. Ke wâé heme geé te wonaa, heme te tieéo pelewé†.

¹⁹ Au, [te junihe eânimung dewé] wogewé lépwo ju bééng! Ke é te junihe picani, heme é niimikewé, pwohewii ni cunu ko ni toomwo heme lé piâbeelee ewa. Ke time o uce tuwoéo koja anaa, heme time uce téele hején a mulihe Iésu ne kowé. ²⁰ Kehe icehi ana caa time é uce

§ **4:15** 4.15 2^e phrase—Grek: E wé a pipwodéén dewé? É pii tewé pie, ânebun, ke wieli geé tuu ni ânenaamiwé beme geé ne tong, hemepie jan. * **4:17** 4.17 Lépwo apwocémun na lé tuié ne pelewé—Omehi Galat 1.7. † **4:18** 4.18 Ai, Wâé heme lé hane me lé pwo nina wâé, he ni benaamwon na tieéo, pwohewii a benaamwon na é mu pelewé. Wieli a pwooti ko nina lé tuié ne pele ni Galat, ai a pwooti ko ni Galat.

temehi aceli me é pwo [beme é picani] tewé. Ke te junihe nimung me é mu pelewé, beme é cihe me bwala ne kowé.

Lupwo piapwo na alo

²¹ Kona pwo ce béén mu kowé celi nimelé me lé pitenedehi ni patén de Moosé? Ke wâé, kehe icehi ana wâé heme lé téne ehi ana e pii ne ni patén. ²²⁻²³ Be caa te tii ne he ni tii iitihí pie, wo *Abérama, ke alo lupwo naîn. Wo pa céiu, ke pa naî ê apenem tice ja kon den; ke wo pa céiu, ke pa naî ê ju mwoden.

Wo pa naî [Agar] ê apenem tice ja kon den, ke e âbeele mu ko ana te nime pa apulie kon. Kehe icehi ana wo [Isaaka] pa naî [Sara, ê mwode Abérama], êna time uce ê apenem tice ja kon, ke e pituie be te wo Padué kuti, na e pacuwohi a bwopiinen ânebun.

²⁴⁻²⁵ Wo lu toomwo naa, ke lu ocine me denye, ne ko lupwo *piapwo [na e pwo wo Padué me de a bele ten]. Wo Agar, ê apenem tice ja kon de Abérama, ke ê ocine [ko ni patén, li e ne wo Padué me de a bele ten, wo lépwo Juif]. Be lé caa â apenem tice ja kon [de ni patén] pwohewii Agar me ni piebehieng. Ke a pwomwo ubwo [te lépwo Juif] é *Iéruusaléma, ke e pwohewii a juwole Sinai ha amu Arabi, [he li lé mi hegi nelang li patén]. Be lupwo piduaan naa, ke a ine a bwo cie ni apulie.

26-28 Mepwo é ne ko Sara, ke ê ocine ko a bwopiinen ânebun de Padué, na e tuwo lépwo apulie koja ana cielé kon. Ke pwo a céiu Iérusaléma na e jeda he *miiden, ke a amu te ati lépwona tuwolé‡. Ke te junihe hiwon jélé. Be caa te tii ne he ni tii iitihi pie:

*Go pipwodéén wogo,
Iérusaléma na tice naîm!
Pwonyebi me pipwodéén,
wogo na time go uce piâbeelee ewa!
Lé caa tahi taabwoniko,
kehe icehi ana go bo te piwéden!
O te junihe hiwon ce naîm
koja êna pwo aiiu hen!*

Ésaïe 54.1

Geé téne, wogewé ni bééng ne he Kériso, wo lépwo naîm, ke te wogenye kuti! Éa, wogenye ke ni ju naîm, kehe time genye uce ni apenem tice ja kon de pace céiu. Be genye pwohewii Isaaka, be genye piâbeelee mu ko a bwopiinen ânebun.

29 Ânebun, ke [wo Ismaël, pa naî é apenem tice ja kon, ke e pwotahi ne ko Isaaka]. Geé alihi, wo pa naîm na e âbeelee mu ko ana nime pa apulie kon, ke e pwotahi ne ko pa naîm na e piâbeelee mu ko a bwopiinen ânebun de Padué. Ke é jenea ni, ke teko piwien ne konye, nina nye piâbeelee mu ko a Jenen Iitihi.

4:26-28 4.26 Ébéru 12.22; Pii Beetihi 21.2,10 **4:26-28** 4.27
Ésaïe 54.1 **4:26-28** 4.28 Roma 9.7 ‡ **4:26-28** 4.26-28 Grek:
26Kehe icehi ana é Iérusaléma na e jeda, na é nyaa tenye, ke pwo
mwomwon den. **4:29** 4.29-30 Genèse 21.9-10; Ioane 8.35

³⁰ E pii pie woté ne ni tii iitihi ne ko anaa? Weengi: *Geé cibéé ê apenem tice ja kon, me pa naîn. Be wo panaa, ke time e o uce hegi ni wâé te caa ten. Te icehi pa naî ê toomwo na time uce ê apenem tice ja kon, na e bo hegi ati.* *Genèse 21.10*

³¹ Geé alihi, wogewé lépwo bééng ne he Kériso, time genye uce ni apenem tice ja kon de ni patén. Wogenye ni ju naî Padué na e caa tuwokenyeŒ!

5

E caa tuwokenye wo Kériso

¹ E tuwokenye wo Kériso, beme te tice celi e ciekenye mwo. Ke wâé heme geé imwi me mang a bwo tuwokewé. Ke geé nemwo ne me wogewé lépwo *apenem tice ja kon mwo [ne ko ace céiu patén].

²⁻³ Geé téne wogewé! Be woéo, Paulo [pa *apostolo] ke é pii mwoiuhi tewé pie: Hemepie geé [hane a péém me Padué ko a bwo] *pwotegoop âcehi ni patén, ke wâé heme geé piténedehi ati ni patén. Ke hemepie wonaa, ke te piticenaado ne ko ana e pwo wo Kériso me denye!

⁴ Wo lépwo béén mu kowé, ke lé hane me lé *mwomwon ne he pwahamii Padué mu ko a bwo piténedehi nen delé ni patén. [Lé pipwocile!] Be wieli o pineitéélé koja Kériso me a *pipwoééhe tice ja kon de Padué.

Œ **4:31** 4.31 Grek: ...Time nye uce naî ê apenem tice ja kon de pace céiu, kehe nye naî ê toomwo na pwo mwomwon den.

⁵ Kehe icehi ana wogenye, ke genye te ju céihi cehi, ke genye ucéihi ne ha a pipwodéén a tan na e bo hegikenye wo Padué ne pelen, ke o wâé ten genye. Ke e picani tenye na a *Jenen Iitihi, ha a benaamwon na nye mwo ucéihi a tan naa*.

⁶ Hemepie tegoop genye, ai mepie time uce tegoop genye, ke te piticenaado ne kon, be nye mu he Kériso Iésu. Ke ana a junaado, ke te icehi a céihi tenye [ne kon]. Ke a céihi tenye, ke o habwii, heme nye pipwoééhe [lépwo béén].

Woo celi e ne me géé padep?

⁷ Wogewé lépwo bééng, géé caa te engen ehi [ne ko Kériso]. Ke woo celi e ne me géé padep koja a pwaaden naa, beme time géé uce âcehi a juuju? ⁸ Time uce wo Padué, be te weeng na e todekewé! ⁹ [Géé pipwocile, be wo pa apulie na e gele, ke jan me e ne me géé tai pilééng.] Pwohewii ana nye mu pii pie: «A cuwo nahi nyaa te pwoloa, ke e pwo me cibi a pwoloa.» ¹⁰ Kehe icehi ana é céihi me mang pie, me céiu a bwo niimihinaado tenye, mu ko a bwo céiu genye ne ko Padaame.

Mepwo é ne ko pa apulie na e pwo me pipenem ni pwonimewé, ke wo Padué, ke e bo tautieng ke pwocuhinaado ten. Te piwien hemepie wo panaa, ke pa apulie na ubwo nang ne pelewé.

¹¹ Wogewé lépwo bééng ne he nii Kériso, time é mu uce patemehi tewé a bwo pwotegoop, âcehi

* **5:5** 5.5 Grek: Wogenye, ke genye ucéihi mu ko a céihi, a bwo mwomwon genye ko a Jenen. **5:6** 5.6 1 Korénit 7.19; Galat 6.15

5:9 5.9 1 Korénit 5.6 **5:10** 5.10 2 Korénit 11.15; Galat 1.7

a bwomu te lépwo *Juif. Be mepie é wonaa, ke wieli time lé uce pipiiéo me ta. Ôhu! Weengi ana é patemehi: [E celuimikenye wo pa *Mesia, he e mele ne ko] a *kuricé. Ke weengaa a piolo ne te lépwo Juif.

¹² Mepwo é ne ko lépwona lé iluukewé, ke [caa emaan jo kolé]. Hemepie nimelé me lé pwotegoop tewé, ke wâé heme lé tahagéi taabwon a aiu telé!

Piténedé a Jenen Iitihi

¹³ Caa te todekewé, wogewé lépwo bééng ne he Kériso, beme tuwokewé ati koja ni naado na ciekewé. Kehe icehi ana géé nemwo pé hauli a bwo tuwokewé naa, beme géé mulie mwo ha a ta. Géé pipenem dewé ne ha a pipwoééhe. ¹⁴ Ati ni âne ni *patén de Moosé, ke e mu ha a âpihuô na te céiu. Weengi: *Go pwo me eânimem de ni béén†, pwohewii a bwo pieânimem dem.Lévitique 19.18.*

¹⁵ É hemepie géé te cuwo ko pipwotahinaado ne kowé, pwohewii ni wota apiaba, ke géé pipwocile, be wieli géé bo pitaunukewé. ¹⁶ Weengaa ana é pii tewé: Géé piténedehi a Jenen Iitihi. Be mepie wonaa, ke time géé o uce âcehi nina te nimewé kon na ta. ¹⁷ Be nina te nimenye kon na ta, ke lé pwobwonihii a Jenen Iitihi; ke a Jenen Iitihi, ke e pwobwonihii nina nimenye kon na ta. Ke lu pipwopa ne konye. Ke lu pineitééhi ni pwonimenye. ¹⁸ Ke hemepie e pihuôkewé na

5:13 5.13 1 Pétéru 2.16 **5:14** 5.14 Roma 13.9 † **5:14** 5.14 Ni béén—Grek: Pana e mu mwonuko, ai Pa ju béém. **5:17** 5.17 Roma 7.15–23

a Jenen Iitihi, ke caa time geé uce mu haahi ni patén. [Ke weengaa ali é pii tewé.]

Utehe nina nimenye kon na ta

¹⁹ Genye omehi ehi ni huô te lépwona lé te âcehi nina nimelé kon na ta:

Lé nenimelé ne ko ni naado na tanim genye kon;

Lé pipule hauli me ni béén;

Lé pwo ni huô na mwiihi ne ko ni éélé;

²⁰ Lé pipwoun de ni *dème duéeé, ke lé pwo eti ta, ke lé piténede ni duéeé;

Lé pitaaba;

Lé pitéétilé, ke lé piokéeé;

Lé pipwoun delé mwo, ke lé caa â huûi lépwo béén;

Lé pineitéélé, ke lé niimihi pie, te ni juuju cehi nina lé pii ne he ni muko puco telé;

²¹ Lé nenimelé ne ko ni de lépwo béén;

Lé piolo, ke lé piwiinaado me ûdu pwohewii ni puwokwo.

Ke hiwon mwo ni naado na lé pwo na ta. Ke é pii tewé mwo ana é caa pii, pie: Wo lépwona lé pwo ni naado naa, ke time lé o uce hegi ni *adéihi te a *Mwametau te Padué.

Ni acehi a Jenen Iitihi

²² Kehe icehi ana weengi ni acehi a Jenen Iitihi, na e ne he ni mulihenye:

A pipwoéeéhe;

A pipwodéén;

A péém;

A piuca;
 A pipwowâé;
 A pipwoeabwé;
 A piténedehi ha a céihi;
²³ A pwonime na bwala;
 A pipwoiipihi.

Ke ni patén, ke te ju tice aceli e pii ne ko ninaa.
²⁴ Wogenye na lépwo apulie te Kériso Iésu, ke genye caa cemeite ne ko a kuricé nina te nimenye kon na ta. ²⁵ Kehe mepie e pamulipikenye na a Jenen Iitihî, ke wâé heme nye ne me e pihuôkenye. ²⁶ Genye nemwo pwo me piubwo genye, ke pihabwiikenye! Genye nemwo pwo me pita ni béénye! Ke genye nemwo pitaaba!

6

Bénebwéne pwooti

¹ Lépwo ju bééng ne he Kériso, hemepie géé temehî pie, pa céiu bééwé, ke e ko pwo nina ta, ke wâé heme géé péééng mwobé ha a pwaaden na wâé. Ke weengaa a penem dewé hemepie géé cumang* ne ha a bwo mulie tewé âcehi a *Jenen Iitihî. Ke géé cihe me bwala ne kon. Ke géé pipwocile, wogewé ati, be koli lé bo céikewé mwobé, me géé pwo nina ta. ² Géé picani tewé ko pé ni âneule tewé. Be me wonaa, ke géé piténedehi a pihuô te Kériso [pie, me

5:24 5.24 Roma 6.6; Kolosé 3.5 **5:26** 5.26 Filipi 2.3 **6:1**

6.1 Mataio 18.15 * **6:1** 6.1 Hemepie géé cumang—Grek: Wo lépwoce mu kowé celi lé cumang. E pii anaa wo Paulo, beme tanahilé, be lé pipii delé. **6:2** 6.2 Roma 15.1

genye pipwoééhenye, be weengaa a ju patén me denye].

³ Mepie e niimihi wo pace céiu pie pwonaado ne kon, ke wo panaa, ke e pipweéo, be te piticenaado ne kon! ⁴ Ke go nemwo tee ome pace céiu, beme go pwo me piubwo go kojaeng. Go te pitauti mwo ni huô tem. Ke mepie wâé, ke go pipwodéén kon. ⁵ Be wâé heme nye te muko pétaapwo alihi ni penem denye.

⁶ A céiu mwo: Ke wâé heme geé pipatihi ni wâé tewé me pana e pacémunikewé ko a pwooti.

Nye tii nina nye cemi

⁷ Go pipwocileko ne ko ni bwopemiko! Go nemwo niimihi pie go taduwo ne he pwahamii Padué†! Be go o te tii nina go te cemi. ⁸ Be hemepie nye cemi, âcehi nina te nimenye kon na ta, ke nye bo tii mwo ne ha a mele, me a bwo tiekenye. Kehe icehi ana mepie nye cemi, âcehi ana nime a Jenen Iitihi kon, ke genye bo tii a *mulie dieli mwo ne pele Padué. ⁹ Ke anaa, na me time nye uce pwo me emaan genye, me nye pwo ana wâé! Ke genye nemwo pipwotupwo! Be o bo tuie a tan na nye bo hegi [a *adéihi]. ¹⁰ É mu ko ati ninaa, ke genye pé a benaamwon na mwo mu ne tenye, me nye mi pwo nina wâé te ni acéihi béénye, ke genye wonaa mwo te ati ni apulie!

Pinekenye

6:5 6.5 Roma 14.12 **6:6** 6.6 1 Korénit 9.11,14 **6:7** 6.7–8
 Roma 8.13 † **6:7** 6.7 2^e phrase—Ai, Time uce jan me nye pihooni
 Padué, ai Time uce jan me nye pipwohuô te Padué.

11 Woéo Paulo, na é imwi a bépwtii‡ beme é panebwénihi ali tii. Geé alihi ni atii na ubwo na é pwo! 12 [Weengi ana é pii tewé]: Geé pipwocilekewé ne ko lépwona nimelé me lé *pwotegoop tewé!

Lé wonaa beme lé piwâélé wo lépwo apulie. Be mwotilé ko lépwo *Juif. Be hemepie lé pipatemehi a pwooti ko a bwo mele te Kériso ne ko a *kuricé, ke wieli o pwotahinaado ne kolé. 13 Wieli lépwona tegoop jélé, ke time uce nimelé me lé âcehi ni *patén de Moosé. Ke te nimelé cehi me lé pipii delé ne he pwahamii lépwo Juif. Ke wâé telé heme lé pii pie, te woélé cehi, na lé ne me geé hegi a bwomu te lépwo Juif§.

14 Woéo, ke time é uce pipii dong ko ni naado na wonaa. É patemehi cehi a bwo mele te Padaame henye, Iésu Kériso, ne ko a kuricé. Ke é mu ko anaa kuti, ke time uce junaado ne tong, ati ni huô na nihe pwonaado ne kon, ne pwo a bwohemwo ce*. Pwohewiin heme lé caa mele ati ninaa, ne kong. Ke woéo, ke pwohewiin heme é caa mele koja ni bwomu te a bwohemwo.

15 Hemepie tegoop genye, ai mepie time uce

‡ **6:11** 6.11 Woéo Paulo, na é imwi a bépwtii—He li e pwotii, ke e cihe, ke pa céiu apulie (secrétaire), ke e tii ana e pii. Kehe icehi ana e pé a bépwtii wo Paulo, beme e pwobwocu telé. § **6:13**

6.13 Grek: Be wo lépwona pwotegoop telé, ke time lé uce âcehi ni patén. Kehe icehi ana wâé telé heme pwotegoop tewé, beme lé pipii delé ko ni ééwé. * **6:14** 6.14 Grek: Kehe icehi ana woéo,

ke time é uce pipii dong, kehe é pipii dong cehi ko a kuricé te Padaame henye Iésu Kériso. É mu kon, ke caa cemeite ne ko a kuricé a bwohemwo me dong, ke woéo mwo me de a bwohemwo.

6:15 6.15 Galat 5.6; 2 Korénit 5.17

tegoop genye, ke te piticenaado ne kon. Ana pwonaado ne kon, ke ana me taatééhi a bwo mulie tenye. Be wo Padué, ke e pwo me wogenye ni apulie na mwo coho.

¹⁶ Wogewé na geé mulie cehi a âpihuô tong naa, ke te wogewé kuti a ju puapulie te Padué†: a puapulie *Isaraéla na mwo coho! Wâé heme e mu kowé ati a pipwoééhe me a péém de Padué!

¹⁷ [É panebwénihi ne ha a bwopiinen pie]: Wo lépwona lé cubwoniéo‡, ke wâé heme lé cuwo! [Be te wo Iésu kuti na e ne a mwomwon dong.] Be é caa junihe mu he ni picani, he é penem me den. Ke ni ahinaado na e ha a ééng, ke ni inen.

¹⁸ Lépwó acéihi bééng, wâé heme e adéikewé wo Padaame henye Iésu Kériso, mu ko a *pipwoééhe tice ja kon den!

Adéikewé! Amen!

† **6:16** 6.16 ...Te wogewé kuti a ju puapulie te Padué—ai ...É ne pehi a ju puapulie te Padué. **6:17** 6.17 2 Korénit 4.10 ‡ **6:17** 6.17 Cubwoniéo—Wieli ni pwooti ko lépwó apwopune na lépwó agele, na lé pii pie, time uce pa ju apostolo wo Paulo, ai wieli emaan Paulo ko lépwó Galat, heme lé te cuwo ko ilueng ko a bwo nimelé me lé ácehi ni patén de Moosé.

xxx

**Tii Iitihi: Élele Iitihi na mwo Coho
Cemuhi: Tii Iitihi: Élele Iitihi na mwo Coho (New
Testament)**

copyright © 2017 Wycliffe Bible Translators, Inc.

Language: Cemuhi

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

f8ee0ae8-19d4-5493-b0f2-3132fc194785